

# 'U dialettu

Supra l'ali  
di lu me dialettu  
decisi un jornu  
di fari puisia  
picchì ju amu  
chista lingua mia.  
Mi piaci tantu lu sicilianu  
e di la me terra  
li so' paroli diclamu.  
'Nna sta lingua  
ci su li me radici  
e tuttu lu focu  
e l'arduri di vita  
chi lu Signuri fici.  
Ci su paroli  
chi in italianu  
perdunu culuri,  
ci sunnu ditti  
chini di saggizza,  
c'è lu cori  
di 'na genti  
chi palpita pi' amuri.  
'A me lingua  
è comu 'na bannerà  
e li paroli lu ventu  
l'accarizza  
comu 'na ciurera.  
È lingua matri  
di la mè giovintù  
e d'idda mai  
mi scordu chiù.

# Sicilia mia

A 'na fata bedda  
cu l'occhi di celu  
un jornu cadiu  
nù sciallu riccamatu...  
ni lu mari s'allargau  
e 'sta miravigghiusa  
isula si furmau.  
Cavuru lu suli  
l'arruspiggia  
e nù friscu ventu  
l'arrifrisca  
l'unna l'accarizza  
e ci canta la canzuni  
di la giuvinizza.  
Nù cori granni  
hannu li so' abitanti  
e aranci e zagari  
profumanu l'amanti.  
Sicilia mia  
sì la stidda  
di lu Mediterraniu  
e li ciavuru di li to'  
jardini in ciuri  
apri li cori a l'amuri.  
Isula addinucchiata  
e di lu cuntinintali  
mala taliata.  
Isula mia  
di tua sugnu orgugliusa  
e di viditi valurizzata  
sugnu disiusa.


# Mari di Sicilia

Mari di Sicilia  
cancianti di culuri  
mari ranni  
mari d'oru  
attornu a st'isula  
cantanu l'angili 'ncoru.  
Mari chi abbrazza  
sta terra mia  
mari chi l'annaca  
e la ninnìa  
mari chinu di ventu  
chi joca cu l'unni  
chi li fa arricciari  
e poi a riva  
li fa strascinari.  
Mari vistutu d'azzurru  
chi cu lu celu  
si vasa appassiunatamenti  
e dunni 'u suli  
sprufunna lintamenti  
mari 'ntimpesta  
chi paura destà  
mari tradituri  
chi a tanti matri  
duna duluri.  
Mari chi spurpa rocci  
e li sframmica  
mari chi 'a nostra peddi  
fa di sita  
mari di cristallu

mari chi  
quannu a luna  
nn'iddu si va a rinfriscari  
d'argentu lu fa divintari.  
Mari chi agghiutti  
e chi cutulia  
mari chi fa biari  
l'arma mia  
mari chinu di vita  
e di misteru  
mari chi è lu specchiu  
di lu celu.  
Iu t'amu  
mari di la me terra  
e la to' 'mmensità  
ni lu me cori s'inzerra.

# Misteru

Picchì nascemu  
picchì amuri sintemu  
picchì a 'sta vita n'avemu  
affeziunari  
si poi tuttu  
avemu a lassari?  
E quantu... quantu pirsuni  
sciogghiri  
stù dilemma  
hannu circatu.  
Ma  
lu misteru di la morti  
nun si po' capiri  
e idda, senza farisi avisari,  
un iornu arriva  
arrubba affetti  
e porta ni' li casi  
lu duluri.  
Forsì è sognu  
'a nostra vita  
forsì è miraggiu,  
ma un farisi dumanni  
forsì füssi cchiù saggiu.



'U viaggiu

# 'U viaggiu

Un jornu qualcunu  
à dicisu lu to' viaggiu  
nì la vita  
e d'iddu nun si sa 'a riuscita.  
Sarà longu, curtu  
stù camminu,  
sarà chinu d'imprivisti,  
ci saranno tanti iurnati tristi  
o saranno facili e sirenì  
li tò passi e sarà  
comu viaggiari in prima classi?  
Comincia la granni avventura  
e poi moriri in menu di un'ura,  
è un viaggiu veramenti stranu:  
senza valigi arrivi  
e senza nenti parti  
e cu nuddu sti mumenti  
ti li sparti.  
Chissà si ci sarà  
qualcunu chi n'aspetta,  
chissà si qualchi porta  
sarà aperta.  
Nu ni purtamu mancu  
li nostri affetti.  
Ma si c'è lu Patreternu  
e n'addumanna comu  
è statu lu viaggiu  
cu ha patitu assai  
si fà' avanti  
e ci addumanna  
u rimborso dù bigliettu

e pi turmari ni 'stu munnu  
pigghia 'u direttu  
e pigghia puru lu vaguni lettlu.

## 'A vita

Cu nasci, cu mori  
cu si marita  
cu chianci cu riri  
cu mancia e ci talia.  
È varia la vita  
nì stu ranni munnu  
dunni 'u tempu camina  
e nenti talia  
dunni tuttu è 'na farsa  
dunni tuttu è poi nenti.  
Gira la rota  
e tuttu passa:  
'na vita chi nasci  
'na vita finisci.

# 'Ni stu 'nfinutu munnu

Quannu lu suli  
codda nì lu mari  
e 'u scuru  
cummogghia la campagna  
viu li stiddi  
chi tremanu nù celu  
e a mia mi pari  
chi una d'iddi  
è la me' arma  
chi palpita di vita.

'Na cosa  
chi sta vivennu  
'u so' mumentu,  
chi granni pari  
a mia vicinu  
ma chi poi  
nunn'avi 'na 'mpurtanza  
ni stu 'nfinitu munnu.

Granni o nica  
è 'a to' vita,  
a secunnu  
di dunni la talii  
pari 'ná cosa chi palpita  
d'amuri  
'na cosa chi palpita  
di nenti.

# 'Nnuccenza

I picciriddi  
sunnu juri  
a lu sbucciari  
profumu  
d'innuccenza e di spiranza.

Occhi senza  
nivuri pinseri  
manu senza  
filu di suzzura  
vucchi senza  
fangu e senza mali.  
Iardini chini  
d'erva frisca  
di luci d'un suli  
chi unn'abbrucia  
d'un vinticeddu  
friscu e vapurusu  
chi spanni  
la fiscura di lu mari.

A luna si cala  
pi' farili jucari,  
li stiddi tintìnnanu  
ni' li loru risateddi.  
Iddi 'ntreccianu ghirlandi  
di sogni e di spiranzi  
e li fannu vulari  
ni' lu pratu di lu celu.

Lu cori hannu friscu  
di surgenti.

Iddi sunnu  
tantu 'nnucenti

e senza pinseri  
vivunu i loru mumenti.  
Sunnu aneddi d'oru  
da catina di la vita,  
sunnu spiranza  
di la storia 'nfinita.

# Aduliscenza

Quannu 'u pettu  
cumincia a lilitari  
e comu 'na rosa abbuttunata  
cumincia a sbucciari,  
a picciuttedda  
'u sangu si senti 'masculari  
e capisci chi si voli  
'nnammurari.  
Cu 'a gonna stritta,  
a vucca di curaddu  
pitturata,  
lu pettu tisu  
porta a la passiata  
e si dà pi' la strata  
'na 'nnacata.  
A picciuttedda  
voli ora sula caminari  
e li cosi di la vita  
assapurari.

# 'A juvinizza

'A juvinizza si vivi 'na vota sula  
e di l'istati avi li culura.

Idda di spiranzi  
è adurnata  
e la so luci  
ti alligria 'a jurnata.  
È tempu di cuntintizza  
è tempu d'amuri  
e 'a vita ti pari  
tutta rosi e ciuri.

Di lu sò profumu  
l'arma è 'mbriacata,  
ma poi t'adduni  
chi di la vita  
fusti cutuliata.

Passanu l'anni  
e cumprenni  
chi lu munnu  
è ammantatu di duluri  
e t'aspettanu tempi duri.

Passanu l'anni  
cu pinseri e cu primura  
e di jritinni  
è junta l'ura.

E dintra di tua  
resta a nostalgia  
di 'na staciuni  
china di puisia  
chi ni lu cori  
ti mittia alligria.